

**YANG DIPERTUA DEWAN DAN AHLI-AHLI MAJLIS MESYUARAT EGARA
NEGARA BRUNEI DARUSSALAM**

YANG HADIR : YANG DIPERTUA DEWAN

Yang Amat Mulia,
Pengiran Indera Mahkota Pengiran Anak (Dr.) Kemaludin Al-Haj
ibni Al-Marhum Pengiran Bendahara Pengiran Anak Haji Mohd.
Yassin, PSLJ., SPMB., POAS., PHBS., PJK., PKL.,
Yang Dipertua Dewan,
Majlis Mesyuarat Negara, Negara Brunei Darussalam.

AHLI RASMI KERANA JAWATAN:

1. Kebawah Duli Yang Maha Mulia,
Paduka Seri Baginda Sultan Haji Hassanal Bolkiah
Mu'izzaddin Waddaulah ibni Al-Marhum Sultan Haji Omar 'Ali
Saifuddien Sa'adul Khairi Waddien, Sultan dan Yang
Di-Pertuan Negara Brunei Darussalam,
Perdana Menteri, Menteri Pertahanan dan Menteri Kewangan,
Negara Brunei Darussalam.
2. Duli Yang Teramat Mulia,
Paduka Seri Pengiran Muda Mahkota Pengiran Muda Haji
Al-Muhtadee Billah ibni Kebawah Duli Yang Maha Mulia
Paduka Seri Baginda Sultan Haji Hassanal Bolkiah
Mu'izzaddin Waddaulah, DKMB., DPKT.,
King Abdul Aziz Ribbon, First Class (Saudi Arabia), PHBS.,
Menteri Kanan di Jabatan Perdana Menteri,
Negara Brunei Darussalam.
3. Duli Yang Teramat Mulia,
Paduka Seri Pengiran Perdana Wazir Sahibul Himmah
Wal-Waqar Pengiran Muda Mohamed Bolkiah ibni Al-Marhum
Sultan Haji Omar 'Ali Saifuddien Sa'adul Khairi Waddien,
DKMB., DK., PHBS., PBLI., PJK.,
Menteri Hal Ehwal Luar Negeri dan Perdagangan,
Negara Brunei Darussalam.

4. Yang Berhormat,
Pehin Orang Kaya Seri Lela Dato Seri Setia Haji Awang Abdul Rahman bin Dato Setia Haji Mohamed Taib, PSNB., SLJ., PHBS., PJK., PKL.,
Menteri Pendidikan,
Negara Brunei Darussalam.
5. Yang Berhormat,
Pehin Jawatan Luar Pekerma Raja Dato Seri Utama Dr. Ustaz Haji Awang Mohd. Zain bin Haji Serudin, DK., PSSUB., DSLJ., PHBS., PJK., PKL.,
Menteri Hal Ehwal Ugama,
Negara Brunei Darussalam.
6. Yang Berhormat,
Pehin Orang Kaya Setia Pahlawan Dato Seri Setia Dr. Awang Haji Ahmad bin Haji Jumat, PSNB., SPMB., DSLJ., PJK., PKL.,
Menteri Perindustrian dan Sumber-Sumber Utama,
Negara Brunei Darussalam.
7. Yang Berhormat,
Pehin Orang Kaya Seri Kerna Dato Seri Setia Haji Awang Abu Bakar bin Haji Apong, PSNB., DSLJ., SMB., PHBS., PIKB., PKL.,
Menteri Perhubungan,
Negara Brunei Darussalam.
8. Yang Berhormat,
Pehin Orang Kaya Johan Pahlawan Dato Paduka Awang Haji Adanan bin Begawan Pehin Siraja Khatib Dato Seri Setia Awang Haji Mohd. Yusof, DPMB., PSB., PJK., PIKB., PKL.,
Menteri Hal Ehwal Dalam Negeri,
Negara Brunei Darussalam.
9. Yang Berhormat,
Pehin Orang Kaya Indera Pahlawan Dato Paduka Awang Haji Suyoi bin Haji Osman, DPMB., PSB., PJK., PIKB., PKL.,
Menteri Kesihatan,
Negara Brunei Darussalam.
10. Yang Berhormat,
Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar, DPMB., PKL.,
Menteri Pembangunan,
Negara Brunei Darussalam.

11. Yang Berhormat,
Pehin Orang Kaya Seri Dewa Mejar Jeneral (B) Dato Seri Pahlawan Awang Haji Mohammad bin Haji Daud, PSPNB., DSNB., DSLJ., DPMB., PHBS., PBLI.,
Menteri Kebudayaan, Belia dan Sukan,
Negara Brunei Darussalam.
12. Yang Berhormat,
Pehin Orang Kaya Seri Utama Dato Seri Paduka Awang Haji Yahya bin Begawan Mudim Dato Paduka Haji Bakar, SPMB., DSNB., PJK., PIKB., PKL.,
Menteri Tenaga (Minister of Energy) di Jabatan Perdana Menteri,
Negara Brunei Darussalam.
13. Yang Berhormat,
Pehin Orang Kaya Laila Setia Dato Paduka Haji Abdul Rahman bin Haji Ibrahim, DPMB., SNB., PIKB., PKL.,
Menteri Kewangan Kedua (II),
Negara Brunei Darussalam.
14. Yang Berhormat,
Pehin Orang Kaya Pekerma Dewa Dato Seri Paduka Awang Lim Jock Seng, SPMB., PJK., PKL.,
Menteri Hal Ehwal Luar Negeri dan Perdagangan Kedua (II),
Negara Brunei Darussalam.

AHLI RASMI YANG DI LANTIK (ORANG-ORANG BERGELAR):

15. Yang Amat Mulia,
Pengiran Setia Negara Pengiran (Dr.) Haji Mohd. Yusuf bin Pengiran Haji Abdul Rahim, DK., SPMB., DSNB., POAS., PHBS., PJK., PKL.,
Negara Brunei Darussalam.
16. Yang Amat Mulia,
Pengiran Dipa Negara Laila Diraja Pengiran Haji Abdul Momin bin Pengiran Haji Ismail, DK., DSNB., DPMB., POAS., PHBS., PBLI., PJK., PKL.,
Negara Brunei Darussalam.

17. Yang Berhormat,
Pehin Datu Singamanteri Kol. (B) Dato Paduka Awang
Haji Mohd. Yasmin bin Haji Umar, DPMB.,
Negara Brunei Darussalam.

**AHLI DILANTIK (ORANG-ORANG YANG TELAH MENCAPAI
KECEMERLANGAN) :**

18. Yang Berhormat,
Pengiran Dato Paduka Haji Damit bin Pengiran Haji Sunggoh,
DPMB., PHBS., PKL.,
Negara Brunei Darussalam.
19. Yang Berhormat,
Pehin Kapitan Lela Diraja Awang Goh King Chin, SMB.,
PHBS.,
Negara Brunei Darussalam.
20. Yang Berhormat,
Orang Kaya Maha Bijaya Awang Haji Othman bin Uking,
SMB., PSB., PJK., PKL.,
Negara Brunei Darussalam.
21. Yang Berhormat,
Awang Haji Idris bin Haji Abas, SNB., SMB., PJK.,
Negara Brunei Darussalam.
22. Yang Berhormat,
Awang Haji Sulaiman bin Haji Ahai, PSB.,
Negara Brunei Darussalam.
23. Yang Berhormat,
Dato Paduka Awang Haji Puasa bin Orang Kaya Seri
Pahlawan Tudin, DPMB., SLJ., PJK., PKL.,
Negara Brunei Darussalam.
24. Yang Berhormat,
Dato Paduka Awang Haji Yunos bin Mohd Noh, DPMB., PJK.,
PKL.,
Negara Brunei Darussalam.

AHLI YANG DILANTIK DARI DAERAH-DAERAH:

25. Yang Berhormat,
Mejar (B) Awang Haji Abu Bakar bin Awang Haji Ibrahim,
SMB., PJK., PKL.,
Penghulu Mukim Kota Batu,
Negara Brunei Darussalam .
26. Yang Berhormat,
Awang Haji Bakar bin Mansor, PSB., PKL.,
Penghulu Mukim Lumapas,
Negara Brunei Darussalam.
27. Yang Berhormat,
Orang Kaya Jaya Putera Awang Haji Muhammad Taha bin
Abd. Rauf, SMB., PSB., PJK., PIKB., PKL.,
Penghulu Mukim Keriam,
Negara Brunei Darussalam.
28. Yang Berhormat,
Awang Haji Mohd Shafiee bin Ahmad,
Ketua Kampong Lumut 1,
Negara Brunei Darussalam.
29. Yang Berhormat,
Awang Haji Sulaiman bin Haji Ahad, SMB., PSB.,
Ketua Kampong Belingos,
Negara Brunei Darussalam.

**HADIR
BERSAMA:**

1. Yang Dimuliakan,
Pehin Orang Kaya Pekerma Jaya Dato Paduka Awang Haji
Judin bin Haji Asar, DPMB., SLJ., POAS., PBLI., PJK., PKL.,
Jurutulis Majlis Mesyuarat Negara,
Negara Brunei Darussalam.

PUSAT PERSIDANGAN ANTARABANGSA (ICC)**Selasa, 21 Safar 1427 / 21 Mac 2006****Majlis mula bersidang jam 9.30 pagi**

Yang Dipertua Dewan: Bismillahir Rahmanir Rahim, sekarang persidangan disambung semula.

Jurutulis: Bismillahir Rahmanir Rahim, Mesyuarat Pertama Dari Musim Permesyuaratan Kedua bagi Majlis Mesyuarat Negara disambung semula dengan mendahului Doa Selamat.

Jurutulis: Membaca (Doa Selamat).

Yang Dipertua Dewan: Ahli-Ahli Yang Berhormat, bagi membolehkan kita menyempurnakan beberapa tajuk anggaran belanjawan yang dapat kita jayakan kira-kira 49 tajuk dan sekarang tinggal lagi ialah 26 tajuk. Jadi sekarang saya minta Ahli-Ahli berkerjasama bagi membincangkan kepada tajuk-tajuk berasaskan kepada kewangan itu dengan tidak melebihi perkataan-perkataan lain supaya perjalanan kita mudah selesai.

Sekarang saya tangguhkan majlis ini untuk kita bersidang secara jawatankuasa.

**(Majlis bersidang selaku
Jawatankuasa)**

Pengerusi: Ahli - Ahli Yang Berhormat, semalam kita dapat selesai dari Kementerian Perindustrian dan Sumber-Sumber Utama. Mulai sekarang kita bincangkan tajuk SJ01A – Jabatan Kementerian Hal Ehwal Ugama.

Yang Berhormat Awang Haji Abu Bakar bin Mansor: Bismillahir Rahmanir Rahim, Yang Amat Mulia Pengiran Pengerusi, peramba ringkaskan permasalahan iaitu:-

1. Mengenai dengan pemeliharaan bagi kerosakan - kerosakan bangunan - bangunan, masjid-masjid, balai - balai ibadat dan sekolah - sekolah ugama di kawasan atau mukim-mukim di darat dan di Kampung Air. Ada

di antara bangunan yang disebutkan ini sudah lama rosak dan dilaporkan kepada pihak yang berkenaan dan sehingga sekarang belum ada pembaikan sebagaimana yang diketahui dalam anggaran perbelanjaan dan peruntukan sebanyak \$450 ribu. Saya pohonkan kepada pihak-pihak yang berkenaan agar kerosakan-kerosakan akan dapat dibaiki.

2. Mengenai dengan pembinaan semula bangunan sekolah-sekolah ugama di Daerah Bunei dan Muara ada terdapat beberapa buah sekolah yang berbentuk sementara. Jadi dipohonkan sekolah ugama yang berbentuk sementara yang sudah lama usianya agar dibuat / diganti dengan bangunan kekal.

Terima kasih, mohonkan ampun.

**Yang Berhormat Perin Jawatan Luar
Pekerma Raja Dato Seri Utama Dr.
Ustaz Haji Awang Mohd. Zain bin
Haji Serudin:** Terima kasih Yang Amat Mulia Pengiran Pengerusi, mengenai dengan pemeliharaan

bangunan-bangunan, masjid-masjid, balai-balai ibadat, sekolah-sekolah ugama yang perlu dibaiki semula, sebenarnya bangunan-bangunan yang ada terdapat kerosakan itu memanglah diambil perhatian dan disiasat oleh Kementerian Hal Ehwal Ugama dan Jabatan Hal Ehwal Masjid.

Untuk memperbaikinya oleh kerana perkara ini berlaku diseluruh negara jadi ini adalah mementingkan keutamaan-keutamaanya bukanlah dibiarkan dengan tidak diperdulikan. Insya-Allah saya sangat-sangat mengalu-alukan diatas maklumat-maklumat seperti ini kerana Jabatan Hal Ehwal Masjid memang mengambil perhatian yang berat terhadap bangunan-bangunan, khasnya masjid-masjid, balai-balai ibadat dan sekolah-sekolah ugama. Insya-Allah kerosakkan-kerosakkan itu akan sentiasa dipantau dan diusahakan pembaikannya.

Mengenai dengan sekolah-sekolah ugama bangunan sementara memanglah ada, ada beberapa buah sekolah-sekolah bangunan sementara itu rancangan-rancangan

untuk memperbaikinya dan di bangunan bangunan kekal, memang kalau kita lihat dalam rancangan kemajuan nanti bangunan banyak sekolah ugama yang dimasukkan didalamnya. Terima kasih.

Pengerusi: Ahli-Ahli Yang Berhormat.

Yang Berhormat Mejar (B) Awang Haji Abu Bakar bin Awang Haji Ibrahim: Yang Amat Mulia Pengerusi, usul bagi menyokong sokongan yang dibuat dalam tajuk SJ01A - Kementerian Hal Ehwal Ugama. Satu rancangan untuk membuka tanah perkuburan orang Islam telah pun dilaksanakan di Pulau Berambang yang berdekatan dengan kawasan yang dinamakan Buang Tawar terletak di Mukim Kota Batu. Kerja-kerja meratakan tanah dan membersihkan kawasan dan memasang pagar telahpun dijalankan 2 ke 3 tahun yang lalu.

Pada masa ini kerja-kerja tersebut diberhentikan dan ditinggalkan begitu saja, tidak diketahui kedudukannya sama ada projek ini siap sepenuhnya atau hanya separuh jalan. Saya juga

difahamkan tanah perkuburan itu masih belum dapat digunakan dan mungkin tidak dapat digunakan sama sekali bagi maksud tersebut. Kerana keadaan tanah yang begitu keras mengandungi batu-batan yang tidak dapat ditembusi oleh cangkul dan skup. Oleh yang demikian, melalui dewan yang mulia ini saya ingin mendapat penjelasan

1. Berapa banyakkah peruntukkan yang digunakan dalam projek ini?
2. Apakah kedudukan kawasan tanah perkuburan ini akan diteruskan juga sedangkan tidak sesuai dengan keadaan tanah yang keseluruhannya keras.
3. Adakah sebelum rancangan atau projek ini dilaksanakan terlebih dahulu mendapat khidmat nasihat daripada pihak-pihak tertentu seperti JKR, khususnya kaji bumi jika tidak dan mengapa boleh jadi demikian.

4. Saya berpendapat jika projek ini diberhentikan dan ditinggalkan begitu saja, maka berdasarkan alasan disebutkan itu tadi ia merupakan projek yang gagal dan tidak mencapai matlamatnya. Kegagalan yang demikian boleh mengundang risiko kearah kerugian di samping boleh mengundang kerarah pembaziran. Maklumat yang dinyatakan dan diberikan berdasarkan kepada muzakarah diantara penghulu-penghulu Mukim dan ketua kampong Daerah Brunei/Muara bersama dengan wakil-wakil Kementerian Hal Ehwal Ugama pada tahun 2005. Dalam sesi taklimat untuk menutup dan membuka tanah perkuburan orang Islam yang baru. Sekian, mohon ampun.

Pengerusi: Ahli-Ahli Yang Berhormat

Yang Berhormat Pehin Jawatan Luar Pekerma Raja Dato Seri Utama Dr. Ustaz Awang Haji Mohd Zain bin Haji Serudin: Terima kasih Yang Amat Mulia, Pengiran Pengerusi, maklumat-maklumat mengenai dengan tanah perkuburan orang Islam

yang baru yang dibuka di Kampung Berambang dan Kampung Buang Tawar. Memang ada masalah pada masa ini. Perkara ini akan disiasat terus dan perundingan-perundingan di antara Kementerian Hal Ehwal Ugama dan Kementerian Pembangunan akan diteruskan bagi menyelidiki lebih mendalam perkara ini. Sebenarnya sebelum rancangan ini dimulakan memanglah ada perundingan dan penyiasatan di antara kedua-dua Kementerian.

Tujuan mengadakan satu perkuburan bagi Kampung Air memanglah sangat mustahak kerana perkuburan Jalan Subok, Jalan Residency sudah penuh dan apabila ada masalah rancangan perkuburan di Kampung Berambang dan Kampung Buang Tawar maka satu perkuburan baru telah dibuat di Kampung Terunjing dan juga di beberapa tempat disiasat bagi kemudahan untuk orang-orang di Kampung Air dan telah diberitahu kepada Penghulu-Penghulu, Ketua-Ketua Kampung.

Setakat ini memanglah kerja-kerja di Kampung Berambang dan Buang

Tawar diberhenti sementara, kerana perundingan-perundingan di antara dua Kementerian-Kementerian sedang berjalan untuk menentukan kedudukannya. Jadi setakat ini saja yang dapat saya berikan Pengiran Pengerusi. Bahawasanya perkuburan Kampung Berambang diberhentikan dan bagi menampung kehendak Kampung Air telah diberitahu kepada Penghulu-Penghulu dan Ketua-Ketua Kampong yang berkenaan bahawa Kubur Subok atau Kubur Jalan Residency ditutup, ada perkuburan-perkuburan lain yang masih boleh digunakan umpamanya Sungai Panga, Perkuburan Kandang Haji Tarif dan lain-lain lagi dan bagi orang di darat atau orang kampung air pun boleh pergi ke Kampong Terunjing, perkuburan yang bersistem. Terima kasih.

Pengerusi: Ahli Yang Berhormat adakah memadai jawapan sila..

Yang Berhormat Mejar (B) Awang Haji Abu Bakar bin Awang Haji Ibrahim: Terima kasih, Yang Amat Mulia Pengiran Pengerusi, apa yang menjadi keraguan kepada peramba yang pertama sekali memang

peruntukan yang telah disediakan telah pun digunakan jadi walaupun pada masa ini projek tersebut diberhentikan untuk menunggu hasil rundingan daripada pihak-pihak yang berkenaan soalnya sekarang adakah projek yang telah nyata tidak dapat kita gunakan ini masih juga akan diteruskan, itu yang pertama.

Yang kedua peramba ada menyatakan tadi projek ini adalah merupakan projek yang gagal jika sekiranya tidak dapat diteruskan maka ia adalah mengundang risiko ke arah kejayaan di samping boleh mengundang ke arah pembaziran, mohon penjelasan, sekian terima kasih.

Pengerusi: Ahli Yang Berhormat silakan.

Yang Berhormat Pehin Jawatan Luar Pekerma Raja Dato Seri Utama Dr. Ustaz Haji Awang Mohd. Zain bin Haji Serudin: Pengiran Pengerusi, sebagaimana yang telah saya terangkan tadi buat sementara ini kerja-kerja telah diberhentikan kerana perundingan-perundingan sedang berjalan

mengenai rancangan itu, sama ada ia akan di teruskan atau sebaliknya tertaklukkan kepada hasil perundingan dan penyiasatan di antara kedua belah pihak nanti, Insya-Allah.

Yang Berhormat Awang Haji Mohd Shafiee bin Ahmad:

Bismillah Hirrahanir Rahim, Assalamualaikum Warahmatullahi Taala Wabarakatuh, Yang Amat Mulia Pengiran Pengerusi dan Ahli-Ahli Yang Berhormat pada tiap-tiap tahun Kementerian Hal Ehwal Ugama ada mengeluarkan kalendar yang cukup lengkap, canggih dan pada waktu yang sama jua tiap-tiap tahun Jabatan Penerangan ada mengeluarkan kalendar jua, jadi saya mencadangkan untuk menjimatkan kos walaupun sedikit kalau dapat diselaraskan pengeluaran kalendar tersebut itu yang pertama.

Yang kedua peramba mendengar beberapa ristaan yang kurang sedap didengar oleh kitani tentang ketiadaan setengah-setengah imam di waktu-waktu solat sembahyang di setengah-setengah masjid di Negara Brunei Darussalam. Sebagai menjaga imej para imam peramba

mencadangkanlah satu kata orang pemantauan haruslah dijalankan.

Yang ketiga peramba khususnya sebagai Ketua Kampong di Mukim Sungai Liang pernah memohon kepada Jabatan Hal Ehwal ugama untuk mendirikan pembinaan sebuah masjid di kampung tersebut, peramba ingin mengetahui akan status permohonan tersebut, sekian terima kasih.

Pengerusi: Ahli Yang Berhormat silakan.

Yang Berhormat Pehin Jawatan Luar Pekerma Raja Dato Seri Utama Dr. Ustaz Haji Awang Mohd. Zain bin Haji Serudin: Yang Amat Mulia Pengiran Pengerusi, terima kasih di atas tiga perkara yang ditimbulkan oleh Yang Berhormat itu. Mengenai kalendar tadi sungguhpun kedua-dua jabatan mengeluarkan kalendar setiap tahun sebenarnya permintaan sangatlah banyak sehingga calendar itu tidak cukup sehingga kehabisan dan ada permintaan dan orang ramai terus di kirim dan sebenarnya kalendar masing-masing jabatan itu

mempunyai kelebihan-kelebihan dan cara-caranya yang tertentu dalam membuat calendar dan mendukung tujuan-tujuan masing-masing.

Yang kedua mengenai dengan ketiadaan imam di waktu-waktu solat di beberapa buah masjid memanglah saya sendiri mendengar perkara ini, dan pemantauan-pemantauan memang dibuat kerana di tiap-tiap daerah ada mempunyai zon dan di tiap-tiap zon itu ada ketuanya, dalam pada itu kita hendaklah juga faham bahawasanya imam-imam itu juga adalah menjadi yang orang-orang jurunikah. Masaalah kitani jurunikah umpamanya ia dilagau pukul dua, tunggu-tunggu, nikahnya pukul empat baru berlangsung, kerana pengantin laki-laki lambat datang ke rumah pengantin perempuan, ketinggalan sembahyang Asar di masjid, inilah di antara perkara-perkara berlaku.

Jadi dalam dewan yang mulia ini, saya mintalah Ketua-Ketua Kampung dan juga Penghulu-Penghulu, bisai tah orang-orang Kampung yang berkenaan itu benar-benar menetapkan jam yang sebenarnya, supaya jurunikah-jurunikh yang

berstatus imam itu tidak meninggalkan masjid sehingga tidak sempat menjadi Imam pada waktunya. Kerana beberapa penghulu sendiri memang merisikkan perkara ini kepada saya selain daripada saya mengetahui sendiri keadaan ini dan Kementerian Hal Ehwal Ugama dan Jabatan Masjid, mengambil perhatian yang berat berhubung dengan imam yang tidak dapat hadir di masjid mengimamkan pada waktu sembahyang. Terima kasih di atas makluman itu, dan kami mengambil perhatian yang berat.

Berhubung dengan permohonan untuk mendirikan sebuah masjid memanglah permohonan-permohonan untuk membina masjid di mana-mana tempat pun diambil perhatian, di antaranya ialah menentukan bilangan penduduk-penduduk yang istilah kitani yang sudah akil baligh, kemudian berapa jauh antara masjid yang dicadangkan dengan masjid yang ada, yang terdekat, adakah difikirkan mustahak masjid baru ini sedangkan masjid yang dekat ada di sana dan masih boleh menampung penjimatan

dalam pada itu masih tapak masjid juga menimbulkan masaaalah, penyiasatan tapak inipun akan mengambil masa. walau bagaimanapun saya minta kepada Yang Berhormat di mana kampungnya Yang Berhormat memohon itu?

Yang Berhormat Awang Haji Mohd Shafiee bin Ahmad: Di Kampung Lumut Satu Pehin.

Yang Berhormat Pehin Jawatan Luar Pekerma Raja Dato Seri Utama Dr. Ustaz Haji Awang Mohd. Zain bin Haji Serudin: Terima kasih Yang Berhormat.

Pengerusi: Ahli-Ahli Yang Berhormat tidak ada pertanyaan lagi, tidak ada perbahasan?

Yang Berhormat Orang Kaya Jaya Putera Awang Haji Muhammad Taha bin Abd. Rauf: Terima kasih Yang Amat Mulia Pengiran Pengerusi, Ahli-Ahli yang Berhormat, Bismillahir Rahmanir Rahim, ada beberapa perkara yang akan saya timbulkan dalam majlis dewan yang mulia ini, bila mana saya meneliti Pegawai Ugama Kanan tahun lepas, tujuh

masa ani tinggal lima, macam itu juga Pegawai Ugama, dulu sepuluh sekarang tinggal sembilan, jadi nampaknya berkurangan, apakah pihak Kementerian tidak mencadangkan lebih banyak pegawai pelajaran kanan dan pegawai pelajaran agama itu yang pertama.

Yang kedua, kalau kita melihat Pejabat Ugama Tutong yang didirikan beberapa tahun lepas nampaknya bangunan itu sudah lama, apakah pihak Kementerian ini untuk membina pejabat baru? Kalau kiranya ada terima kasih, kalau kiranya tidak ada lebih baik diusahakan.

Yang ketiga, mengenai dengan pembinaan Masjid Kiudang di Tutong, nampak kalau didengar daripada apa yang kita difahamkan ia akan dibina dalam tahun berapa? Dalam masjid jua tambahan pembinaan bangunan Masjid Keriam, jadi nampaknya pun belum ada hasil harap mendapat penjelasan, terima kasih.

Yang Berhormat Pehin Jawatan Luar Pekerma Raja Dato Seri Utama Dr. Ustaz Haji Awang Mohd. Zain bin Haji Serudin: Pengiran Yang Dipertua, terima kasih atas maklumat-maklumat ini, berhubung dengan kepegawaian itu saya sebenarnya kurang jelas antadi, tolong Yang Berhormat ulangi lagi mengenai yang pertama kerana kurang jelas.

Yang Berhormat Orang Kaya Jaya Putera Awang Haji Muhammad Taha bin Abd. Rauf: Terima kasih kalau saya lihat dalam anggaran belanjawan ani tahun lepas pegawai ugama kanan tujuh orang tapi mengapa tia pulang turun kepada lima orang, macamatua jua pegawai ugama dulu sepuluh orang, sekarang tinggal sembilan orang jadi peluang-peluang mereka ani untuk meninggikan lagi supaya prestasi Jabatan Ugama akan lebih berwibawa lagi, terima kasih.

Yang Berhormat Pehin Jawatan Luar Pekerma Raja Dato Seri Utama Dr. Ustaz Haji Awang Mohd. Zain bin Haji Serudin: Satu perkara di muka satu yang sebuting di muka berapa tu? Kalau kitani lihat di muka

surat satu, pegawai ugama sepuluh jadi sembilan, sila lihat "lain-lain hal" satu jawatan dipindah ke Jabatan Majlis Ugama Islam, jadi inda kurang, ia orang atu dipindah, kerana dahulu "Bahagian" Majlis Ugama Islam sekali lagi di "Jabatan" Majlis Ugama Islam, orang atu dipindah ke sana, yang saya ingin saya tahu lagi yang merujuk kepada pegawai ugama kanan tujuh menjadi lima muka surat berapa Yang Berhormat? Di halaman "lain-lain hal" satu jawatan ke Bahagian Penyelidikan dan Perkembangan, satu jawatan lagi ditukar gelarannya menjadi Timbalan Setiausaha Majlis Ugama Islam, ertinya tidak berkurangan, satu Jawatan ditukar gelarannya dan seorang yang duduk di sana pindah ke tempat lain, tidak ada kurang, masih lagi bilangan atu, hanya orangnya pindah ke jabatan lain dan satu jawatan ditukar nama.

Mengenai dengan Pejabat Ugama Tutong terima kasih di atas perhatian Yang Berhormat atu, memanglah Kementerian Hal Ehwal Ugama sendiri merasakan perkara ini dan difikirkan, dan akan diambil tindakan-

tindakan yang bersesuaian, terima kasih. Mengenai dengan Masjid Kiudang insya-Allah perkara-perkara masaalah tanah, masaalah *plan*-nya akan diambil tindakan sesegera mungkin, insya-Allah, yang keempat atau saya kurang jelas tadi, dapat Yang Berhormat dapat mengulangi lagi.

Yang Berhormat Orang Kaya Jaya Putera Awang Haji Muhammad Taha bin Abd. Rauf: Ingin saya mengulangi lagi, Yang Amat Mulia Pengerusi, di Bangunan Masjid Kampung Keriam nampaknya ada beberapa kali pegawai-pegawai yang berkenaan melihat dan memeriksa kononya akan ditambah bangunannya itu sehingga pada masa ini.

Yang Berhormat Pehin Jawatan Luar Pekerma Raja Dato Seri Utama Dr. Ustaz Haji Awang Mohd Zain bin Haji Serudin: Terima kasih, kalau ketani lihat bukan belanja tahunan, tetapi dalam perbelanjaan Kemajuan Negara muka surat 34, 9210 – 01 bangunan tambahan Masjid Kampong Keriam harga rancangan \$850 ribu dan bagi tahun 2006 – 2007 diperuntukkan 510 ribu ada dalam Rancangan Kemajuan.

Yang Berhormat Orang Kaya Jaya Putera Awang Haji Muhammad Taha bin Haji Rauf: Ingin tahu jua Pengiran Pengerusi bahawa bila tah masanya kan menambah itu, estimate sudah ada, kuasa pun sudah ada.

Pengerusi: Ahli Yang Berhormat masalah pentadbiran itu sudah diberitahu tadi inda payah ditanya, jangan memanjangkan perbicaraan kalau perkara-perkara yang berjalan biasa. Silakan ada ahli-ahli mahu bertanya.

Yang Berhormat Awang Haji Sulaiman bin Haji Ahad. Bismillah irahman irahim, assalamualaikum warahmatulahi wabarkatuh, Yang Amat Mulia Pengiran Pengerusi dan Ahli Yang Berhormat dalam menghadapi hasrat murni rakyat dan penduduk daerah Temburong sepertimana yang dititahkan oleh Kebawah Duli Yang Maha Mulia Paduka Seri Baginda Sultan Haji Hassanah Bolkiah Mu'izzaddin Waddaulah di majlis Konvekesen Ke 17 Universiti Brunei Darussalam pada hari Selasa, 2 Syabaan 1426 bersamaan 6 September 2005.

Di mana Baginda bertitah bahawa asas untuk menubuhkan sebuah Universiti Islam tulin sudah ada, dan apa yang tinggal kini hanyalah menunggu saat untuk kita mengurak langkah dan akan berfungsi untuk menampung keperluan masa kini dan akan datang, di samping menjadi mercu tanda kegemilangan kepada Negara.

Yang Amat Mulia Pengiran Pengerusi akan titah baginda yang amat ikhlas untuk menyampaikan kepada rakyatnya, ianya amatlah disambut baik oleh rakyat dan penduduk di Daerah Temburong, maka dalam cadangan ini saya bagi mewakili penduduk Daerah Temburong kiranya diwujudkan nanti Universiti Islam tersebut akan dapat dibangunkan di daerah Temburong, Sekian wabilahi taufik wal hidayah wasalam alaikum warahmatullahi wabarkatu.

Pengerusi: Ahli Yang Berhormat.

Yang Berhormat Pehin Jawatan Luar Pekerma Raja Dato Seri Utama Dr. Ustaz Haji Awang Mohd Zain bin Haji Serudin: Yang Amat Mulia

Pengiran Pengerusi titah Kebawah Duli Yang Maha Mulia dijunjung mengenai dengan penubuhan Universiti Islam tulin dan sebuah Jawatankuasa telah dibentuk dan dipengerusikan oleh Yang Mulia Timbalan Menteri Pendidikan dan mereka telah pun bermesyuarat beberapa kali dan mendirikanannya itu akan memakan masa. Mengenai pemilihan tempat itu pun tertakluk kepada cadangan-cadangan Jawatankuasa itu dan bukan saja Jawatankuasa itu bahkan terpaksa akan dilantik Konsultan-Konsultan tertentu bagi memilih tempat dan perkara ini akan diselesaikan sebaik-baiknya, kita sama-sama menunggu.

Encik Gamat menikam gamat,
Bunga melur kembang melati,
Mudah-mudahan hidup selamat,
Dalam telur boleh dinanti.

Pengerusi: Ahli Yang Berhormat ada lagi ahli-ahli yang ingin membahaskan tajuk Kementerian Ugama, sekiranya kalau tidak ada.

Yang Amat Mulia Pengiran Setia Negara Pengiran (Dr) Haji Mohd

Yusuf bin Pengiran Haji Abdul Rahim: Tuan Pengerusi saya sendiri ingin bertanya saja Menteri Ugama tentang kononnya ada sebuah masjid di Kampong Sengkarai, bukan kerana saya tinggal di Kampong Sengkarai maka saya bawa ini tetapi ini adalah untuk kebajikan penduduk Kampung Sengkarai yang lebih kurang dalam 1000 orang yang tinggal di sana tapi tidak ada masjid.

Jadi sama ada bahagian lain tidak dikhaskan tapi saya dipercayai cadangan mengadakan masjid di Kampong Sengkarai sudah berpuluh tahun sampai sekarang tidak ada satu pun nampak.

Di sini dalam cadangan Kementerian Ugama, bangunan tambahan masjid di Kampong Keriam ada, bangunan di Kampong Pengkalan Batu ada, bangunan di Bengkurong ada, Sungai Buloh pun di Labi pun ada. Tapi Kampung Sengkarai yang lebih kurang 10 tahun dicadangkan tapaknya dari satu tempat ke satu tempat tak ada sampai sekarang orang-orang Kampung Sengkarai, keluar sekali lagi saya katakan bukan saya tinggal di Kampong Sengkarai, nak sembahyang

pun di Kuala Tutong pun ada di masjidnya, di Bandar Tutong pun ada masjidnya tapi kalau dapatlah oleh kerana ada cadangan itu jadi saya harap supaya dapat, pasal apa saya tidak nampak kalau ada saya tidak bertanya, terima kasih.

YB Pehin Jawatan Luar Pekerma Raja Dato Seri Utama Dr. Ustaz Haji Awang Mohd Zain bin Haji Serudin:

Yang Amat Mulia Pengerusi kadang-kadang memberi jauh hati, sebenarnya di Sengkarai ada Balai Ibadat, Balai Ibadat ani antara balai ibadat yang maju pernah mendapat anugerah dalam anugerah takmir masjid dan saya sendiri pun pernah berkunjung ke balai ibadat ini, memang perlu ada masjid di sana bagi menggantikan bangunan ini. Al-kisah ialah masalah tanah, tanah Lot 2107, oleh seorang hamba Allah yang ingin berwakaf luasnya kira-kira satu ekar setengah.

Setelah dikenal pasti hasil lawatan Kementerian Ugama dan Jabatan Masjid melawat dan yang berkenaan dengan balai ibadat, mesyuarat diadakan dibalai Ibadat itu,

jawatankuasa Takmir dan beberapa wakil kampung, mereka tidak bersetuju dengan tapak yang ingin diwakafkan itu melihat kepada beberapa masalah, diantaranya “*infrastructure*” cukup susah maka Kementerian Ugama pun mencari tempat dan Perancang Bandar mencadangkan satu tempat di Jalan Pengasing dekat Highway Tutong Belait, usaha pun dibuat.

Tiba-tiba seorang hamba Allah dengan tanah Lot 1879 ingin berwakaf dan kami pun ahlan wasahlan wa marhaban kerana ini adalah kerja yang berkebajikan. Sesudah diproses, ada pula gundalai yang lain sehingga wakaf itu tidak dapat diteruskan, maka sekarang kembali lah tanah di jalan Pengasing, dekat Highway Belait Tutong dan alhamdulillah baru-baru ini telah digazzetekan. Insya-Allah proses bagi membina Masjid sedang diusahakan tapi tidaklah saya berjanji bila. Tetapi insya-Allah, masjid itu akan didirikan kerana mustahak di sana ada masjid, terima kasih.

Pengerusi: Ahli Yang Berhormat sekira tidak ada ahli-ahli ingin membincangkan dan

membahaskan rang undang-Undang tajuk Kementerian Hal Ehwal Ugama ini maka tajuk ini kita kira lulus.

Jurutulis: Tajuk SJ 101A Jabatan Kementerian Hal Ehwal Ugama dijadikan sebahagian daripada jadual, Tajuk SK01A, Kementerian Pembangunan:

Pengerusi: Ahli-ahli Yang Berhormat.

Yang Berhormat Mejar (B) Awang Haji Abu Bakar bin Awang Haji Ibrahim: Terima kasih lagi Yang Amat Mulia Pengiran Pengerusi dan Ahli-Ahli Yang Berhormat. Khusus bagi sokongan bagi sokongan peruntukan atas tajuk SK 03A Jabatan Kerja Raya.

Pengerusi: Yang Berhormat sekarang kita di Jabatan Kementerian Jabatan Pembangunan bukan Kerja Raya.

Yang Berhormat Mejar (B) Awang Haji Abu Bakar bin Awang Haji Ibrahim: Mohon diampun peramba tarik balik.

Pengerusi: Ahli-Ahli Yang Berhormat sekiranya tidak ada.

Yang Berhormat Mejar (B) Awang Haji Abu Bakar bin Awang Haji Ibrahim: Sebelum itu menjunjung ampun barangkali untuk meminta penjelasan peramba kurang faham samada boleh usul atau pertanyaan yang akan peramba hadapkan ini boleh dibawa ke tajuk SK01A Jabatan Kementerian Pembangunan.

Pengerusi: Ahli Yang Berhormat biasanya apabila membahaskan sesuatu tajuk hendaklah menumpukan segala perbincangan itu pada tajuk yang berkenaan iaitu samada cara perbelanjaan dan berbagai-bagai lagi yang kena mengena dengan nya. Jadi kalau hal itu akan disuarakan tidak lah menjadi masalah, silakan.

Yang Berhormat Mejar (B) Awang Haji Abu Bakar bin Awang Haji Ibrahim: Dalam tajuk diatas peramba menyokong sepenuhnya cuma barangkali ada sedikit pertanyaan kalau sekiranya dapat dijelaskan yang berhubung kait kiranya bertepatan dengan tajuk ini. Iaitu Kementerian

Pembangunan. Ingin tahu saja satu bangunan yang menjadi misteri pada masa kini iaitu diantara Sungai Kianggeh dan masuk ke Sungai Kianggeh ada satu bangunan pada masa ini yang tergendala pembinaannya.

Soalnya sekarang bukan lah peramba bertanya siapa yang menjadi pemilik bangunan itu. Apa yang peramba ingin penjelasan, apa yang jadi dengan bangunan ini, yang tidak juga diteruskan samada disiapkan atau pun tidak, mungkin soalan barangkali atau pertanyaan ini perlu mendapat beberapa pandangan yang lain jika sekiranya, mudah-mudahan tidak menyentuh mana-mana pihak, cuma peramba ingin menghadapkan apakah yang akan jadi terhadap bangunan ini, sekian terima kasih.

Pengerusi: Ahli-ahli Yang Berhormat diminta Ahli-Ahli Yang Berhormat yang berkenaan memberikan penjelasan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin

Begawan Mudim Dato Paduka Haji

Bakar: Bismillah Irahman Nirahim Peramba menjunjung maaf kerana tidak dapat memberi penjelasan kerana bangunan ini adalah kepunyaan persendirian. Tapi kalau diperlukan Peramba boleh menyiasat karang tanah jenisnya, berapa, itu saja. Tapi apa yang terjadi kepada bangunan sama ada diteruskan, Peramba inda dapat memberi penjelasan. Bukan inda dapat, tidak ada penerangan yang Peramba dapat offer atau ketengahkan pada masa ini tapi kalau kan mau peramba boleh menyiasat dan memberikannya dalam akhir karang setelah menyiasat.

Pengerusi: Ahli-Ahli Yang Berhormat penerangan ada pada Kementerian Pembangunan jadi cukup, sekiranya puas hati dan saya meminta ahli ahli hadirin, sekiranya tidak ada pertanyaan lagi maka tajuk ini akan kita luluskan sebahagian daripada tajuk Undang-Undang Kewangan 2006 dan 2007.

Jurutulis: Tajuk SK01A Jabatan Kementerian Pembangunan dijadikan sebahagian daripada Jadual SK02A Jabatan Kemajuan Perumahan.

Yang Berhormat Awang Haji Idris

bin Haji Abbas: Bismillah Hirahman Nirahim. Yang Amat Mulia Pengiran Pengerusi, Ahli Yang Berhormat, Assalamualaikum Warahmatullahi Wabarakatuh dan salam sejahtera. Saya setinggi tinggi menjunjung kasih atas peluang diberikan Jabatan Kemajuan Perumahan salah satu jabatan dalam Kementerian Pembangunan yang penting yang bertanggungjawab atas penyediaan rumah-rumah bagi Negara ini.

Rancangan perumahan kita boleh dikatakan yang terbaik dirantau ini malah mungkin juga terbaik di dunia. Ini ialah *visi* dan hasrat Kebawah Duli yang Maha Mulia yang inginkan melihat setiap rakyatnya mempunyai rumah. Setinggi-tinggi menjunjung kasih.

Saya pernah menjadi President APH (Asian Association Planning Housing) beberapa tahun yang lalu, apabila kami bersidang conference membuat presentation mengenai dengan Skim Perumahan Brunei kesemua rakan-rakan Asian hairan dan tercengang mendengarkan

akan kemudahan-kemudahan yang diberikan terkandung dalam skim-skim tersebut seperti rancangan perpindahan, perumahan, rakyat jati, landless skim, bagi rakyat juga skim pinjaman loan, yang almost interest free juga perumahan bagi pekerja-pekerja kakitangan Kerajaan. Seolah-olah mereka tidak percaya. Walaubagaimana pun mereka mengatakan orang-orang Brunei sangat-sangatlah beruntung.

Alhamdulillah, jadi orang-orang Brunei yang beruntung yang berkenaan ini dipohonkanlah memberikan kerjasama seperti membuat pembayaran yang diperlukan untuk mengelakkan tunggakan. Kerana masalah tunggakan kalau terlalu serius akan menjejaskan pendapatan hasil pendapatan Negara. Apakah tindakan yang akan diambil mengenainya? Skim ini juga begitu mudah dan menarik sekali menyebabkan semua orang-orang berharap-harapkan bergantung kepadanya semata-mata.

Jadinya demand atau permintaan naik tinggi sehinggakan supply tidak mencukupi disediakan dalam waktu-

waktu yang dikehendaki. Soalan saya, adakah budget untuk Jabatan Perumahan mencukupi bagi tenaga-tenaga manusia jabatan ini untuk melaksanakan atau mengimplementasikan penyediaan-peyediaan perumahan ini.

Saya difahamkan beberapa tahun yang lalu, permintaan atau keperluan perumahan kira-kira 1,000 buah setahun dan yang dapat diusahakan tidak lebih daripada 400 buah setahun ini bererti setiap tahun 600 buah "*we have short*" setiap tahun. Jadi angka ini akan meningkat setahun demi setahun yang juga saya difahamkan setakat ini kira-kira hampir 20,000 buah diperlukan. Jadi soalan saya berapakah % keperluan perumahan selain rumah-rumah persendirian yang diusahakan oleh Jabatan Kemajuan Perumahan, adakah peluang-peluang diberikan kepada pihak pihak konsultan misalnya untuk memberikan perkhidmatan-perkhidmatan kearah ini. Barangkali perancangan ini memang ada tetapi bagaimana dengan perlaksanaannya untuk mencapai kematlamat ini dengan

lebih berkesan. Sukacita disyorkan juga konsep bekerjasama antara pihak-pihak awam dengan pihak-pihak swasta mestilah digalakkan. Terima kasih.

Pengerusi: Yang Berhormat Menteri Pembangunan silakan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar:
Bismillah Irahman Nirahim. Assalamualaikum Warahmatullahi Wbarakatuh, peramba menjunjung kaseh sekali lagi. Pertama mengenai tunggakan. Apa yang dibuat oleh Kementerian pada masa ini atau jabatan pada masa ini ialah membuat profile penunggak-penunggak ani kerana tidak dinafikan bahawa sebahagian daripada penunggak itu adalah penunggak betul betul berkesulitan. Tetapi apa yang disuahkan ialah untuk menapis penunggak-penunggak supaya kitani tahu mana penunggak-penunggak yang tidak berkelayakan untuk menunggak itu. Jadi apabila ini diketahui nanti akan diambil beberapa tertakluk kepada dasar dan cadangan

yang pada masa ini masih dalam penelitian.

Mengenai dengan skim bagi mencepatkan perumahan ani, memang disedari bahawa terdapat defisit dalam pemberian perumahan ani, jadi apa yang dibuat pada masa ini bukan saja di Kemajuan Perumahan ialah ia ada satu Majlis Jawatankusa Perumahan. Satu daripadanya ialah untuk menilai semula keberkesanan dan kaedah-kaedah pemberian perumahan ani termasuklah cara-cara memberi ani kerana adalah secara kasar dilihat dalam pemberian sekarang ani, sistem pemberian sekarang ani dengan tiap-tiap buah rumah diberi rumah tanah ani, bukanlah satu pilihan yang sustainable yang dapat dijangka tahan jadi beberapa usaha seperti mengadakan rumah-rumah padat atau rumah-rumah yang bertingkat juga sedang diusahakan.

Dalam pada itu termasuklah juga yang disebutkan oleh Yang Berhormat tadi untuk mengadakan synergy ataupun hubungsama dengan pihak-pihak swasta dalam menjalankan projek ani termasuklah

beberapa usaha-usaha seperti kaedah-kaedah pembangunan atau pembangunan rumah yang baru misalnya atau kaedah-kaedah pengkontrekan dan sebagainya.

Insya-Allah, peramba adalah baru dalam Kementerian ini dan Peramba melihat daripada usaha-usaha yang telah dilakukan oleh Yang Berhormat Menteri Pembangunan yang lama banyak rancangan-rancangan atau sudah ada, Jadi Peramba hanya akan melihat rancangan-rancangan atau dan menjalankannya dan sambil atau menyedari akan keadaan-keadaan pemohon-pemohon dan orang-orang yang perlu atau berkehendakkan rumah atau. Tidak dinafikan bahawa pemberian rumah pada masa ini adalah kurang daripada keperluan. Terima kasih.

Yang Berhormat Awang Haji Bakar bin Mansor: Yang Amat Mulia Pengiran Pengerusi, saya ingin mendapatkan maklumat daripada pihak yang berkenaan iaitu mengenai dengan Rancangan Perpindahan Perumahan yang terdapat di kawasan di Mukim Lumapas iaitu di Kampong Lumapas. Jadi Peramba ingin tahu

kerana sejauh ini Peramba belum mendapat maklumat yang rasmi dari pihak berkenaan untuk apa dan berapa dan untuk rakyat mana dan penduduk mana?

Jadi sejauh ini apa yang peramba saya maklum rancangan perumahan ada terdapat yang peramba sebutkan tadi, jadi bila rancangan ini akan dijangka siap dan juga berapa unit kah diperuntukkan di kawasan yang peramba sebutkan tadi dan juga sekaligus penduduk persekitaran kawasan tersebut supaya memohonlah pada pihak yang berkenaan untuk diberikan keutamaan supaya mengisi rumah-rumah yang akan dibangunkan di tapak yang Peramba sebutkan. Menjunjung ampun, terima kasih.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Menjunjung kasih sekali lagi. Peramba mohon maaf kerana jumlah sebenarnya tidak peramba ingat tetapi melebihi 100 lah boleh jadi lebih daripada itu. Tetapi apa

yang Peramba ingat perpindahan itu dijalankan beberapa fasa.

Fasa pertama akan siap pada akhir daripada peringatan Peramba pada akhir tahun 2007. Kalau anda silap. Tetapi kerja-kerja infrastruktur, kerja-kerja infra dan tanah sudah selesai sekarang infra dan setengah-setengah rumah telah pun dikontrekkan.

Jadi Peramba akan mendapatkan maklumat anda dalam boleh jadi dalam pagi anda tetapi apa yang mengenai pemohon itu ialah perumahan anda akan diperuntukkan bukan sahaja kepada pemohon-pemohon yang berhampiran tetapi kepada semua pemohon-pemohon yang berkecuali kerana pada masa anda Jabatan Kemajuan Perumahan mempunyai senarai pemohon-pemohon yang berkecuali mengikut tahun-tahun dan giliran-giliran itu jadi apabila ia sudah siap karang rumah-rumah anda akan ditawarkan kepada pemohon-pemohon yang berkecuali bukan sahaja di kawasan itu saja di mana saja mereka berkecuali dan mau

tinggal di rumah itu. Menjunjung kasih.

Pengerusi. Terima kasih.

Yang Berhormat Dato Paduka Awang Haji Yunus bin Mohd Noh:

Assalamualaikum Warahmatullahi Wabarakatuh, Salam sejahtera. Bismillah Irahman Nirahim. Yang Amat Mulia Pengiran Pengerusi dan ahli ahli Yang Berhormat. Saya ingin mengemukakan soalan mengenai dengan satu kawasan tapak yang mana telah disediakan "*infrastructure*"nya dan *platform*-nya semua sudah pun sedia barangkali dalam jangka 6 ke 7 tahun yang lalu iaitu kawasan di antara Kampong Lugu dan "*Costal Highway*".

Saya ingin bertanya adakah kawasan ini kawasan perumahan? Jika ianya kawasan perumahan bilakah jangka ianya akan dimajukan? Dan seperti yang disuarakan oleh Yang Berhormat tadi macam manakah kalau sekiranya ada pihak-pihak swasta yang berkeinginan untuk menyertai projek perumahan ini? Terima kasih.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar:

Peramba menjunjung kasih sekali lagi. Peramba mengesahkan bahawa tapak perumahan di Lugu ini memanglah tapak perumahan. Ianya telahpun siap topo dan “*infrastructure*” belum disiapkan dan diharap perumahan dan “*infrastructure*” akan dijalankan dalam RKN 9 tertakluk kepada peruntukan. Jabatan Kemajuan Perumahan mengalu-alukan “*any proposal*” daripada pihak pengusaha untuk sama-sama bagaimana caranya mengusahakan rumah tersebut. Insya-Allah.

Pengerusi: Terima kasih.

Yang Berhormat Awang Haji Mohd Shafiee bin Ahmad: Terima kasih Yang Amat Mulia Pengiran Pengerusi, pada masa ini pemohon yang sudah mempunyai tanah sama ada tanah itu di atas namanya sendiri atau pun suaminya kalau suami isteri atau pun di atas nama bapanya kalau ia anak beranak tidak akan layak untuk dipertimbangkan mendapatkan Skim Perumahan.

Jadi cadangan peramba supaya peraturan dan cadangan ini supaya pemohon yang sebegini dapat dipertimbangkan jika sekiranya tanah yang dipunyainya itu tidak dapat dimajukan kerana kos yang tinggi, barangkali tanah itu paya yang memakan perbelanjaan yang besar jika dimajukan.

Kedua, kalau dapat Skim Perumahan yang pada masa ini yang terdapat di kawasan Bandar kalau boleh dilaratkan dan diampit-ampiti di kawasan-kawasan pendalaman seperti kalau di Daerah Belait di Bukit Sawat kah di Mukim Labi kah. Sekian Yang Amat Mulia Pengiran Pengerusi. Terima kasih.

Pengerusi: Ahli Yang Berhormat.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Yang Amat Mulia Pengiran Pengerusi, menjunjung kasih sekali lagi. Sebenarnya soalan pertama yang dibangkitkan oleh Yang Berhormat itu memang sudah ada,

siapa yang sudah bertanah, biasanya tidak dapat perpindahan tetapi apabila mereka merayu bahawa tanahnya itu susah untuk dimajukan maka permohonannya itu akan dipertimbangan. Ada pemohon-pemohon yang sudah ampit rumah dengan cara ini.

Mengenai melaratkan Skim Perumahan ke kawasan luar bandar, perkara ini pun sedang dalam pertimbangan bergantung kepada keadaan tanah dan kesesuaian dan adanya tanah itu “availability” ditempat-tempat itu sedang dipertimbangkan. Apa yang menjadi kerisauan peramba / saya kitani nampaknya membuka tanah itu luas, rumahnya tidak banyak.

Kedua, dalam pada itu, beberapa skim-skim seperti in-fill dan penggeranan sudah diadakan dikawasan-kawasan tersebut misal di sana itu akan diadakan jua tu dan ini sudah berjalan jua ni bukanlah skim perumahan yang ada macam yang dilihat di Kampung Rimba, tapi skim in-fill dan penggeranan memang ada tu dikawasan-kawasan pendalaman.

Pengerusi: Ahli Yang Berhormat, sekiranya tidak ada lagi ingin membahaskan Tajuk ini maka kita luluskan di dalam Jawatankuasa.

Jurutulis: SK02A: Jabatan Kemajuan Perumahan dijadikan sebahagian Jadual SK03A: Jabatan Kerja Raya.

Pengerusi: Ahli-Ahli Yang Berhormat, adakah Ahli-Ahli ingin membahaskan Tajuk SK03A ini iaitu Jabatan Kerja Raya. Sila bahaskan.

Yang Berhormat Mejar (B) Awang Haji Abu Bakar bin Awang Haji Ibrahim:

Terima kasih Yang Amat Mulia Pengiran Pengerusi dan Ahli-Ahli Yang Berhormat, usul bagi menyokong peruntukan atas Tajuk SK03A : Jabatan Kerja Raya. Perkara atau usul yang akan saya kemukakan di dalam Majlis yang mulia ini, ialah membesar dan menaikkan taraf jalan raya sepanjang Jalan Residency dan Jalan Kota Batu. Sebut sahaja Jalan Residency daripada Jambatan Sungai Kianggeh menuju ke Pusat Kesenian hingga ke Kampung

Sungai Lampai dan Kampung Pintu Malim.

Semua orang Brunei tahu bahawa kawasan ini adalah kawasan yang indah dan menarik lebih-lebih lagi kita melihat pemandangan indah Kampung Air yang menjadi kebanggaan kita semua, tetapi sayangnya jalanraya yang disebutkan ini agak kecil dan sempit, ditambah lagi dengan kesesakan kereta yang diletakkan dikiri kanan jalan memburukan lagi keadaan. Kenderaan yang diletakkan begitu banyak ditempat yang begitu terhad, tidak teratur dan tidak mempunyai sistem.

Di akhir-akhir ini keadaan jalanraya bertambah sesak dengan kenderaan yang diletak di kiri kanan sepanjang jalan-jalan tersebut akan bertambah apabila sistem letak kereta berbayar metro diperkenalkan di tiga tempat berdekatan dengan kawasan tanah perkuburan Islam yang mungkin orang ramai tidak berminat untuk menggunakannya. Pemilik kenderaan pun berpindah dan meletakkan disepanjang Jalan Residency daripada Pusat Kesenian hingga ke Kampung Sungai Lampai dan Pintu Malim.

Manakala Jalan Kota Batu pula daripada Kampung Pintu Malim menaiki Bukit Muzium hingga jalan pusing keliling Kampung Mentiri telahpun dibina pada tahun 1972 ketika lawatan Baginda Queen ke Negara Brunei Darussalam sudah 34 tahun yang lalu. Keadaan hari ini jalan tersebut masih sama seperti 34 tahun dahulu sempit dan kecil sedangkan kenderaan serta pengguna jalan tersebut bertambah banyak dan ramai.

Pengerusi: Ahli Yang Berhormat, butir-butir yang dikemukakan sudah pun cukup panjang saya minta penjelasan Ahli Yang Berhormat, Menteri Pembangunan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Menjunjung kasih sekali lagi, peramba ingin mengesahkan bahawa sudah peruntukan melebarkan jalan daripada Jalan Residency ke Bomba, tapi apabila ia ditenderkan terdapat beberapa keperluan untuk mengubah design yang lebih baik caranya, jadi masa

ini masih dalam “*design stage*” tapi sudah ada peruntukannya.

Mengenai jalan-jalan daripada sana sampai ke Kampung Mentiri seperti yang dibangkitkan oleh Yang Berhormat itu, akan disiasat mengikut keutamaan kerana peruntukan yang diberikan nanti kita bahaskan dalam pembangunan nanti dapat kitani lihat disana. Dijunjung.

Pengerusi: Terima kasih.

Yang Berhormat Dato Paduka Awang Haji Yunos bin Mohd Noh:

Terima kasih Yang Amat Mulia Pengiran Pengerusi, saya ingin menyentuh mengenai perkara dengan pembayaran bill air, orang ramai bertanya-tanya mengapakah bill air kadang-kadang datangnya 6 bulan dan dalam jangka yang panjang begitu bill telah terkumpul banyak dan banyak orang ramai yang bersungut dari segi pembayarannya terlampau banyak tidak terbayar kadang-kadangnya.

Peramba maklum bahawa Jabatan Kerja Raya juga mengikhtiarkan bahawa meter-meter dibaca oleh tuan-

tuan rumah, apabila tuan-tuan rumah membaca dan menghantar ke Jabatan yang berkenaan, itu pun memakan masa lebih kurang dalam 2 bulan baru bill air ada.

Saya syorkan kalau boleh pembacaan meter air ini disalurkan dengan pembacaan meter elektrik di swastakan dengan menggunakan anak-anak kampung yang tidak berkerja dan orang yang telah bersara. Barangkali nyata sekali, masalah yang dihadapi oleh Jabatan berkenaan bukannya pembacaan meter tetapi barangkali memproses pembacaan dan membuat tuntutan dan saya juga mencadangkan kalau boleh disalajurkan wakil-wakil swasta yang dibenarkan untuk membaca meter ini dapat memproses dan dapat menyediakan bill seterusnya. Sekian terima kasih Pengiran Pengerusi.

Pengerusi: Ahli Yang Berhormat Menteri Pembangunan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji

Bakar: Menjunjung kasih sekali lagi, Peramba mengucapkan terima kasih kepada Yang Berhormat kerana membangkitkan perkara ini pada penelitian peramba pun nampaknya sistem pembayaran air ini masih banyak perlu diperbaiki jadi cadangan-cadangan tersebut dapatlah dijadikan input dalam menilai pembaikan ini. Dalam pada itu, dalam majlis yang mulia ini, peramba menjunjung memohon kerjasama orang ramai jika sekiranya bill belum datang, mun ada rasakan membayar bill bayar tah jua supaya dapat di “reconcile” bill tersebut, jangan tah ditunggu sampai batah baru tah kan membayar. Menjunjung kasih.

Pengerusi: Terima kasih.

Yang Amat Mulia Pengiran Dipa Negara Laila Diraja Pengiran Haji Abdul Momin bin Pengiran Haji Ismail: Yang Amat Mulia Pengiran Pengerusi, Peramba menjunjung pertanyaan sedikit sahaja yang berkenaan, berkenaan peruntukan yang terdapat di Jabatan Kerja Raya bermula muka surat dalam budget ini dari 15, 16, 17, 18, 19, 20 dan 21 peruntukan yang diadakan bagi Tahun

2005 hingga 2006 berjumlah \$136 juta \$169 ribu \$725 ringgit, ini bukanlah untuk gaji kakitangan, tetapi ialah untuk projek-projek yang dikendalikan dalam masa yang ditentukan ini. Peramba ingin tahu adakah projek-projek yang banyak ini sudah selesai, atau masih dalam pengkajian. Inikah sebabnya perbelanjaan untuk tahun 2006/2007 bagi projek-projek tidak lagi di perlukan?

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji

Bakar: Peramba menjunjung kasih sekali lagi. Apa yang baru dalam peruntukan tahun ini. Peruntukan Kerajaan terbahagi kepada tiga satu PE – Personal Emolument kakitangan, OCAR – perbelanjaan khas yang berulang-ulang dan satu OCSE, Perbelanjaan Khas. Apa yang tidak ada disini adalah perbelanjaan khas sebanyak \$42,042, \$544,480 yang kulam dalam muka surat 21. Jadi mulai tahun ini Kementerian Kewangan mengambil semua OCSE tiap-tiap Jabatan itu dan menaruhnya

ke Kementerian-Kementerian. Jadi ditaruhnya ke Kementerian Pembangunan, untuk makluman Kementerian Pembangunan pada tiap-tiap tahun ini, selalunya peruntukannya hanyalah dalam \$10 juta. Ertinya tahun ini peruntukannya meningkat kepada yang sudah diluluskan kepada \$66 juta ertinya \$50 juta peruntukan-peruntukan OCSE daripada Jabatan-Jabatan lain dipindah ke Kementerian Pembangunan.

Jadi kalau kitani lihat, imbas semula Jabatan Kementerian Pembangunan muka surat 35, kalau kitani lihat sana totalnya tiap-tiap tahun hanyalah \$10 juta tapi tahun ini bertambah kepada \$66 juta ertinya \$56 juta itu adalah OCSE daripada Jabatan-Jabatan lain itu. Jadi kalau kitani lihatpun di Kementerian Pembangunan kebanyakannya OCSE itu adalah daripada Jabatan-Jabatan Kerja Raya, Bahagian Air dan sebagainya.

Jadi menjawab soalan yang disabdakan oleh Yang Berhormat itu tadi setengah-setengah projek ini sudah dijalankan, tetapi mana yang

masih lagi tidak dijalankan dimasukkan kedalam OCSE dan diberikan skim value yang baru, itu yang peramba difahamkan misalnya adalah dapat kitani lihat Jabatan Kerja Raya misalnya muka surat 26 jalan-jalan raya ke Daerah Brunei dan Muara itu dulu di Jabatan Kerja Raya, sekarang di Kementerian Pembangunan.

Peramba berasa yakin memang ada dalam vote lepas, tetapi kerana OCSE ditiadakan dan dipindah ke Kementerian Pembangunan, macam itu juga Kementerian-Kementerian lain seperti Kementerian Perindustrian, kerana sarabab Yang Berhormat Menteri Kewangan Kedua, supaya kalau minta "*Virement Warrant*" akan dapat di teleti di kemudian, kami difahamkan keadah baru ini memberikan better control kepada Menteri-Menteri atau Setiausaha-Setiausaha Tetapnya yang berkenaan, dan juga menyenangkan "*Virement*" daripada satu borang kepada satu tajuk-satu tajuk tidak akan diproses secara melalui Kementerian Kewangan tetapi dapat diproses oleh Setiausaha Tetap

Kementerian itu sendiri. Ini pembaharuan yang dibuat oleh Yang Berhormat ani, Menteri Kewangan Kedua (II).

Yang Berhormat Awang Haji Bakar bin Mansor: Yang Amat Mulia Pengiran Pengerusi, peramba banyak menjunjung kasih peramba saya cuba untuk meringkaskan pertanyaan ini mengenai dengan pembinaan jalanraya di Negara Brunei Darussalam memang setaraf dengan jalan-jalan antarabangsa, sebagaimana yang akan peramba saya sampaikan disini iaitu ada diantara suara rakyat dan penduduk di negeri ini ingin mohon meminta sampaikan kebanyakannya jalan-jalan yang dibena di Negara Brunei Darussalam khususnya termasuk jalan-jalan lebuh raya ada diantaranya jalan tersebut tidak mempunyai space ataupun bahu jalan di kiri kanan.

Jika terjadi pengguna-pengguna atau kereta yang mengalami kerosakan ataupun pancit untuk menukar tayar, jadi mendapat bahaya sedikit untuk pengguna-pengguna menyimpan kerita atau menukar tayar jadi dipohonkan jika pembinaan yang akan

datang perkara yang peramba saya sebutkan ini haruslah difikirkan semula dan diambil kira. Sekian junjung kasih.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Peramba menjunjung kasih atas cadangan itu, dan akan ditelitilah mana-mana keperluan yang utama itu akan diberikan. Dalam pada itu mengambil kesempatan dalam majlis yang mulia ini jua, apabila pembinaan lebuh raya dan jalanraya ke Tutong, dan setengah-setengah jalan raya di Kuala Belait disediakan bahu jalan yang luas, disana tah tempat orang memotong pulang karang ani, tekadohong dan menghargai Yang Berhormat untuk mengadukan masalah diorang ani, kamipun memohonlah Ahli-Ahli Yang Berhormat, memberitahu supaya bahu-bahu jalan itu digunakan dengan sempurnanyalah, ertinya indada bahu jalan basungkut jua, InsyaAllah akan diusahakan, ada bahu jalan gunakan untuk "*insedent*",

kena pakai untuk memotong dan rising pulang.

Pengerusi: Ahli Yang Berhormat penjelasan cukup jelas.

Yang Berhormat Orang Kaya Jaya Putera Awang Haji Muhammad Taha bin Abd Rauf: Yang Amat Mulia Pengerusi Majlis, Ahli-Ahli Yang Berhormat saya menyuarakan dalam dewan yang mulia ini, membesarkan Jalan Lamunin, Kuala Abang, termasuk Birau Tanjung Maya, jalan-jalan seperti di atas pada masa ini menjadi laluan penting selain daripada penggunaan lebuhraya.

Pengerusi: Ahli Yang Berhormat terus sahaja, Ahli Yang Berhormat untuk memohonkan untuk membesarkan jalan raya Lamunin, kerana jalanraya sudah banyak dibincangkan.

Yang Berhormat Orang Kaya Jaya Putera Awang Haji Muhammad Taha bin Abd Rauf: Terima kasih Pengerusi, jadi macam itulah keadaannya, membesarkan Jalan Lamunin.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Peramba menjunjung kasih atas cadangan itu dan mengambil maklum dalam perancangan-perancangan yang akan datang.

Pengerusi: Ahli-Ahli Yang Berhormat.

Yang Berhormat Awang Haji Sulaiman bin Haji Ahai: Bismillahi Rahman Nirahim, Yang Amat Mulia Pengrian Pengerusi, soalan saya ini ialah mengenai dengan pembayaran kepada kontrakter-kontrakter, kontrakter-kontrakter menghadapi masalah bahawa pembayaran kepada mereka agak lambat sedikit walaupun baru-baru ini ada kemajuan, saya ingin bertanya kepada Menteri yang berkenaan adakah kelambatan ini berpunca daripada ketiadaanya budget bagi projek-projek ini. Saya difahamkan ada satu jawatankuasa telah ditubuh kira 2, 3 tahun lalu untuk menyelidiki masalah-masalah, apakah keputusannya penelitian

jawatankuasa yang saya sebutkan tadi itu.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar:

Yang Berhormat, Menjunjung kasih sekali lagi, kelambatan membayar bukan mengenai budget, itu diketahui, kerana kalau budget tidak ada projek itu tidak akan berjalan, ertinya bukan kerana budget, tetapi beberapa system dalaman yang masa ini sedang diteliti, jadi perkara itu diambil maklum, dan abis peramba jua sentiasa mengadakan perundingan dengan Kementerian Kewangan macamana memantau dan memperbaiki sistem ini, tidak dinafikan itu sungutan ini memang ada. Menjunjung kasih, jadi laporannya itu akan diteliti.

Pengerusi: Terima kasih, kalau demikian sekiranya ada berlaku sedemikian terus komplin sahaja pakai surat kepada pihak yang berkenaan, dari masa kesemasa.

Yang Berhormat Awang Haji Mohd Shafiee bin Ahmad: Terima kasih,

Yang Amat Mulia Pengiran Pengerusi saya ingin bertanya kepada Yang Berhormat Menteri berkenaan melihat kepada anggaran budget Jabatan Kerja Raya bahawa saya sekiranya ada sesuatu projek diluar daripada projek ini, adakah plan kontegensi budget, contohnya di Mukim Liang, satu gelombang besar akan melanda projek "*peritoneal*" jalan disepanjang itu memang sampit jadi mungkin diperbesarkan sedikit, adakah budget khas untuk menangani perkara yang sedemikian. Terima kasih Yang Amat Mulia Pengerusi.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Junjung kasih sekali lagi. Dalam pada itu jua dalam budget Jabatan Kerajaan ada terdapat budget yang tidak betentukan tempatnya, fasa berapa, jadi ertinya kalau sekiranya ada keperluan yang lebih mendesak dapatlah daripada budget-budget tersebut itu abis peramba pertimbangkan kepada keperluan yang mendesak itu. Junjung kasih.

Pengerusi: Terima kasih. Ahli-Ahli Yang Berhormat sekiranya tidak ada lagi perbahasan, maka Tajuk SK03A – Jabatan Kerja Raya diluluskan dalam jawatankuasa ini untuk menjadi satu tajuk dalam undang-undang kewangan dalam 2006/2007.

Jurutulis: Tajuk SK03A – Jabatan Kerja Raya dijadikan sebahagian daripada jadual. Tajuk SK04A – Jabatan Perancang Bandar dan Desa.

Yang Berhormat Awang Haji Mohd Shafiee bin Ahmad: Terima kasih sekali lagi Yang Amat Mulia Pengiran Pengerusi saya cuma menyusul atau bertanya proses mengenai dengan memohon membuat rumah kerana setiap pemohon akan di hantar ke Jabatan Perancang Bandar dan Desa.

Hamba memohon untuk demi membantu bukan saja Ketua Kampung bahkan semua agensi Kerajaan bahawa setiap permohonan untuk pembangunan rumah bukan saja memohon kebenaran tetapi supaya akan dapat memaklum kepada Ketua Kampung atau Penghulu.

Bukan atas memohon kebenaran tetapi cuma untuk sebagai makluman sepertimana yang telah dibuat oleh setengah - tengah Kementerian umpamanya Kementerian Ugama, Kementerian Pendidikan dan banyak lagi. Ini adalah satu maklumat yang penting kepada abis peramba kerana boleh membantu apabila data-data dikehendaki di suatu ketika nanti. Sekian terima kasih.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Dijunjung kasih atas cadangan itu akan diambil perhatian. atas cadangan itu.

Pengerusi: Ahli-Ahli Yang Berhormat, ada Ahli-Ahli ingin membahaskan kalau tidak tajuk Jabatan Perancangan Bandar dan Desa diluluskan didadlam Jawatankuasa ini iaitu tajuk SK04A Jabatan Perancang Bandar dan Desa.

Yang Berhormat Dato Paduka Awang Haji Yunos bin Mohd Noh:

Terima Kasih Yang Amat Mulia, Pengiran Pengerusi Jabatan Perancang Bandar dan Desa salah satu tugasnya memproses permohonan-permohonan pembinaan yang telah dikendalikan dalam satu jawatankuasa yang diPengerusikan oleh Pesuruhjaya Perancang Bandar dan Desa, dan di Jabatan Bandaran, di Kawasan Bandar Seri Begawan ada juga jawatankuasa yang serupa sama juga di Jabatan Tanah memproses permohonan-permohonan kemajuan dalam kawasan-kawasan Bandaran dan kawalan jadinya saya berpendapat jawatankuasa - jawatankuasa ini

Pengerusi : Ahli Yang Berhormat jangan dibawa bilangan-bilangan dan atau aturcara yang ada, soal apa apakah yang menjadi keraguan kepada Ahli.

Yang Berhormat Dato Paduka Awang Haji Yunos bin Mohd. Noh: Jadinya peramba ingin bertanya kalau boleh jawatankuasa-jawatankuasa disatukan memandangkan tugas Jabatan Perancang Bandar dan Desa selain daripada memproses permohonan pembinaan tadi juga

adalah yang mengendalikan '*master plan*' dan '*local plan*' bagi seluruh di Negara Brunei Darussalam. Itu sajalah Pengiran Pengerusi.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Menjunjung kasih memang benar apa yang diserankan oleh Yang Berhormat. Jadi hanya Akta Perancang Bandar dan Desa pada masa ini hanya meliputi apa yang dipanggil kawasan terkawal sahaja. Jadi di kawasan-kawasan yang lain tergantunglah kepada Daerah, Bandaran mengikut undang-undangnya. Tetapi apa yang akan diusahakan kalau pun jawatankausa berlainan bagi berlainan kawasan akan diusahakan supaya 'information' atau penerangan-penerangan yang sama tidak akan payah dinilai semula atau "*overlap*" ini akan diusahakan, Insya-Allah. Sebelum Akta apa yang dipanggil "*Planning Act*" akan di "*finalise*". Terima kasih.

Pengerusi: Ahli-Ahli yang Berhormat, sekiranya tidak ada lagi

Ahli-Ahli yang ingin membahaskan tajuk SK04A Jabatan Perancang Bandar dan Desa maka kita meluluskan tajuk ini dalam perbincangan Jawatankuasa ini.

Jurutulis: SK04A Jabatan Perancang Bandar dan Desa dijadikan sebahagian dari Jadual. SK05A Jabatan Perkhidmatan Elektrik

Yang Berhormat Awang Haji Sulaiman bin Ahad : Bismillahir Rahman Nirrahim, Yang Amat Mulia Pengiran Pengerusi, Ahli-Ahli Yang Berhormat perkara yang peramba akan hadapkan di Dewan yang mulia ini adalah mengenai dengan janakuasa elektrik di Daerah Temburong. Janakuasa elektrik yang digunakan di Daerah Temburong pada masa ini sebanyak 4 buah enjin sahaja yang boleh digunakan daripada 5 buah enjin yang ada yang menggunakan minyak diesel.

Dalam keluhan-keluhan yang selalu didengar oleh orang ramai ialah kerap kali terjadinya terputusnya bekalan elektrik kadangkala memakan masa yang lama untuk diperbaiki yang menjejaskan kerja-kerja harian,

rumah-rumah persendirian, peniaga-peniaga, sekolah-sekolah dan membantut perkembangan swasta.

Ingin mengimbas dalam pengetahuan kejadian terputusnya bekalan api elektrik tersebut sepanjang tahun 2004 sahaja sebanyak 38 kali, tahun 2005, pada tahun yang lepas sebanyak 50 kali.

Alhamdulillah pada tahun ini 2006 sebanyak 3 kali sahaja. Peramba ingin bertanya kepada Kementerian berkenaan dalam menangani dalam kerosakan-kerosakan tersebut. Berapakah masa yang diperuntukkan Tekad Pemedulian Orang Ramai (TPOR) untuk menyelesaikan dan memperbaiki kerosakan-kerosakan, Yang Amat Mulia, Pengiran Pengerusi dan seperti yang pernah dimaklumkan oleh Pengarah Jabatan Elektrik yang terdahulu bahawa talian, satu talian voltage tinggi dari Bandar Seri Begawan di Kampong Likiun, Daerah Temburong melalui bawah laut. Jika benarlah akan perkara ini bilakah perancangan ini akan dilaksanakan. Demikilanlah Pengiran

Pengerusi mengenai dengan perkara yang dihadapi. Terima kasih.

Pengerusi: Ahli-Ahli Yang Berhormat, Menteri Tenaga di Jabatan Perdana Menteri.

Yang Berhormat Pehin Orang Kaya Seri Utama Dato Seri Paduka Awang Haji Yahya bin Begawan Mudim Dato Paduka Haji Bakar: Yang Amat Mulia, Pengiran Pengerusi, Yang Amat Berhormat mengenai dengan Tekad Pemedulian Orang Ramai barangkali dalam perkara ini saya belum dapat menjawab dalam waktu ini kemudian akan diterangkan berapa lama perkara ini akan dapat diselesaikan. Tapi dalam menyentuh bekalan tenaga elektrik di Temburong memang diakui kedudukannya kurang baik daripada yang ada. Cara pembakaran tenaga menggunakan diesel saja yang ada pada masa ini. Keenam enjin itu adalah diesel enjin. Masalah diesel enjin ini banyak menggunakan part yang bergerak.

Pengerusi: Ahli Yang Berhormat, terus jawab sahaja jangantah dicerita lagi diesel enjin, terus jawab sahaja

samada akan dibaharui ataupun bagaimana?.

Yang Berhormat Pehin Orang Kaya Seri Utama Dato Seri Paduka Awang Haji Yahya bin Begawan Mudim Dato Paduka Haji Bakar: Mohon ampun, perkara ini seperti yang disebutkan oleh Ahli Yang Berhormat itu pada tahun ini Alhamdulillah '*incident*' itu kurang jua sudah, enjin-enjin berkenaan telah diperbaiki. Dan disamping itu kakitangan juga telah ditambah dan telah ada 2 orang '*engineer*' yang berkelulusan ditempatkan di sana untuk mematai keadaan di Temburong disamping dibantu dengan kakitangan daripada Bandar kalau sekiranya ada berlaku kerosakan. Mengenai dengan '*high voltage*' itu memang ada perancangan untuk menyambung Daerah Temburong dengan pusat bukan dalam perancangan kemajuan masa ini. Kalau diperkenankan akan dimasukkan pada kemajuan akan datang. Ada perancangan untuk '*submarine cable*' daripada Bandar menuju ke Temburong, untuk mengelakkan daripada menggunakan diesel. Terima kasih.

Yang Berhormat Awang Haji Bakar

bin Mansor: Yang Amat Mulia, Pengiran Speaker, banyak-banyak menjunjung kasih, peramba ringkaskan, keadaan yang berlaku di Bandar Seri Begawan khususnya sama juga dengan di Temburong tadi tetapi peramba saya inda mengitung berapa banyak kali '*current*' terputus di Bandar Seri Begawan kalau pertandingan kali mungkin Di Bandar lebih banyak atau lebih tinggi, jadi pertanyaan peramba saya apabila kejadian ini berlaku *current* putus inda ada api, jadi terus dihubungi kepada pihak berkenaan, Alhamdulillah hubungan cepat, pekerjaanya dihantar, apabila ditanya dimana putusnya dimkana sebabnya perkara-perkara ini berlaku, jadi ada di antaranya pihak pegawai menjawab disebabkan yang diganti yang lama, dipakai dulu sementara disini, satu. Kedua, kesian juga kita ani, seorang diri hanya , benar ni penghulu sebenarnya kurang orang kami ani, kami jua di tarik di muara, ditarik sengkurong, kami jua ditarik ke mari, jadi perkara sedemikian peramba ingin tahu, walaupun perkara ini mustahil berlaku, tapi barangkali patut jua barangkali berlaku, jadi diharapkan

piahk yang berkenaan akan dapat menyiasat perkara ini jika perkara ini berlaku tambahlah pekerja dan gantilah benda-benda yang lama kepada yang baru, atau alat-alat yang baru, Sekian banyak-banyak menjunjung kasih.

Pengerusi: Ahli-Ahli Yang Berhormat.

Yang Berhormat Pehin Orang Kaya Seri Utama Dato Seri Paduka Awang Haji Yahya bin Begawan Mudim Dato Paduka Haji Bakar:

Sekali lagi menjunjung kasih Yang Amat Mulia, Pengiran Pengerusi, dua perkara sahaja, memang diakui kakitangan bagi bahagian ini yang dipanggil Unit Pemeliharaan Volta Rendah dan Lampu Awam ini dalam 42 orang sahaja bagi seluruh Negara. Diakui tidak cukup kakitangan termasuk bergaji hari dan sebagainya bagi keseluruhan. Jadi kalau ada orang menalipon 144 mereka ini saja akan dilusirkan untuk membetulkan apa-apa kerosakan. Kedua, masalah-masalah peralatan itu memang ada yang sudah lama jadi dalam perancangan tahun 2006, kerja-kerja untuk memperbaiki

'network' dan distribution serta 'transformation' ada dalam peruntukan yang akan dibincangkan nanti. Disamping itu juga yang didapati kebanyakan kerosakan itu disebabkan oleh 'intermittent supply'. 'Intermittent supply' ini disebabkan gangguan pokok kayu, binatang dan cuaca yang menyebabkan gangguan kepada aliran tenaga dan kedua disebabkan oleh kilat. Ini yang menyebabkan gangguan-gangguan itu. Itu saja Yang Amat Mulia Pengiran Pengerusi mengenai perkara itu.

Yang Berhormat Awang Haji Mohd.

Shafiee bin Ahmad: Terima kasih Yang Amat Mulia Pengiran Pengerusi, menambah apa yang telah dicadangkan dan diusulkan oleh Ahli Yang Berhormat sebentar tadi menambah kalau dapat jua khusus di Daerah Belait, di Pekan Seria kenderaannya sudah lama-lama kalau boleh dibelikan baru kerana ia menjejaskan perkhidmatan kepada orang awam. Yang Kedua, alhamdulillah peramba melihat waktu malam di simpang-simpang besar di sepanjang jalan Lebuhraya Tutong sehingga membawa ke Lumut Bay Pass sudah ada lampu.

Alhamdulillah terima kasih, tetapi peramba mohonkan sedikit di atas aspek keselamatan kalau boleh dipasang lampu street light walaupun tidak rapat seperti Lebuhraya Tutong - Brunei sedikit-sedikit dimasukkan untuk keselamatan. Lampu ini di pasang di antara Lebih Raya Tutong – ke Telisai dan daripada Lumut Bay Pass ke Seria sampai ke Kuala Belait, walaupun di pasang jarang-jarang pun macam gigi sudah memadai, alhamdulillah demi keselamatan di waktu malam. Sekian, Terima kasih Yang Amat Mulia Pengiran Pengerusi.

Yang Berhormat Pehin Orang Kaya Seri Utama Dato Seri Paduka Awang Haji Yahya bin Begawan Mudim Dato Paduka Haji Bakar:

Yang Amat Mulia Pengiran Pengerusi. Mengenai dengan kenderaan itu sudah ada dalam peruntukannya dalam bagi tahun ini untuk menggantikan kenderaan baru untuk di Kuala Belait. Mengenai dengan keperluan untuk menambah lampu-lampu awam kalau sekiranya dapat dinilai bagaimana ia boleh disesuaikan dengan peruntukan

yang ada, kalau pun dimasukkan ke dalam rancangan yang akan datang.

Pengerusi: Terima kasih , Ahli-Ahli Yang Berhormat sekiranya tidak ada perbincangan lagi.

Yang Berhormat Orang Kaya Jaya Putera Awang Haji Muhammad Taha bin Abd. Rauf: Terima kasih Ahli Yang Berhormat. Yang Amat Mulia Pengiran Pengerusi serta Ahli-Ahli Yang Berhormat peramba ingin menimbulkan satu masalah bagi penduduk-penduduk dan rakyat khusus saja di Daerah Tutong macam itu jua di daerah lain. Mengenai dengan pembayaran elektrik, nampaknya pada masa ini ia pakai anggaran, kalau dalam dua tiga bulan ia mendatar ia punyai meter, kalau \$80 sebulan ke 3 bulan, ada lebih baik perkara ini supaya dikaji balik tidak memberatkan kepada pengguna. Terima kasih.

Pengerusi: Diambil perhatian sahaja, Ahli-Ahli Yang Berhormat sekiranya tidak ada perbincangan pada tajuk SK05A - Jabatan Perkhidmatan Elektrik maka tajuk ini kita luluskan dalam jawatankuasa pada pagi ini.

Jurutulis: Tajuk SK05A – Jabatan Perkhidmatan Elektrik dijadikan sebahagian daripada jadual. Tajuk SK06A – Jabatan Tanah.

Yang Berhormat Awang Haji Sulaiman bin Haji Ahad: Bismillahi Hirrahman Nirrahim, Yang Amat Mulia Pengiran Pengerusi dan Ahli-Ahli Yang Berhormat. Mengenai dan Labu Estet dan Batu Apoi. Labu Estet adalah bekas ladang getah kepunyaan sebuah Syarikat British, setahu peramba ladang yakni tanah telah diserahkan kembali kepada kerajaan sebahagian kecil daripada ladang ini telah dijadikan projek perumahan perpindahan di kawasan berkenaan. Dalam persoalan peramba apakah cadangan Kerajaan kawasan yang tidak termasuk dalam perumahan kerana ianya masih luas dan ada kemudahan-kemudahan asas.

Yang kedua bilakah kerajaan bercadang supaya kawasan ini iaitu Labu Estet dan Batu Apoi dibuka kepada pengusaha-pengusaha anak tempatan atau luar Negara membuka atau melabur untuk membuka perusahaan sama ada

usahasama atau persendirian kerana jika ada perusahaan atau kilang dibuka di kawasan berkenaan akan memberi peluang pekerjaan kepada penduduk di negara ini khasnya bagi penduduk Daerah Temburong.

Perkara yang kedua Yang Amat Mulia Pengiran Pengerusi mengenai dengan masalah pemohon tanah TOL, ia juga menjadi keluhan kepada orang ramai kerana untuk menunggu jawapan yang dibuat daripada jabatan yang berkenaan terlalu lama ada yang sampai 3 tahun baru ada jawapan. Sekian, Yang Amat Mulia Pengiran Pengerusi. Terima kasih.

Pengerusi: Ahli Yang Berhormat Menteri Pembangunan, silakan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Menjunjung kasih sekali lagi Pengiran Pengerusi dan terima kasih kepada Ahli Yang Berhormat kerana menimbulkan Labu Estet dan Batu Apoi ini. Sebenarnya belum ada rancangan yang khusus bagi tanah-tanah yang tidak diberikan itu tapi mengenai cadangan kedua untuk

mengadakan usahasama dan industri itu akan dibincangkan dengan Kementerian berkenaan kerana kitani mendengar kelmarin bahawa tanah yang sudah disediakan oleh Kementerian berkenaan masih belum lagi diusahakan.

Mengenai dengan tanah TOL perkara ini sedang dalam penelitian Jabatan Tanah dan Kementerian Pembangunan untuk membuat satu dasar yang lebih jauh dan lebih “sustainable” kerana pada masa ini cara-cara pemberian TOL ini boleh diperbaiki semuanya. Menjunjung kasih.

Pengerusi: Ahli-Ahli Yang Berhormat, jika sekiranya tidak ada lagi perbahasan.

Yang Berhormat Pehin Kapitan Lela Diraja Awang Goh King Chin: *Honorable Speaker, members of colleagues, I wish to touch on our country's property market. Our property sector has been depreciating from year to year. This is a result from the restriction imposed by the Land Department.*

Certain buyers are not allowed to buy more than 5 acres of land, is this practice gazette in the Law or just a policy. If it is just a policy, the department concerned should review the case seriously so that the property market will improve. Thank your.

Pengerusi: Yang Berhormat Menteri Pembangunan, silakan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Menjunjung kasih sekali lagi Pengiran Pengerusi dan terima kasih jua kepada Ahli Yang Berhormat kerana membangkitkan perkara mengenai pembelian tanah 5 ekar ini. Dalam majlis yang mulia ini cukuplah peramba komen pendek sahaja, bahawa tanah ini adalah satu isu yang sangat sensitif kepada bangsa kitani iaitu negara kitani kerana dasar-dasar yang diambil itu adalah kadang-kadang diambil dengan "*sensitivity*" atau menyedari dengan keadaan-keadaan kitani yang ada. Jadi dasar itu adalah satu dasar bukannya dalam undang-undang dan kalau dasar itu kitani ambil ia adalah satu dasar yang

mempunyai satu wawasan yang jauh dan kalau ia memerlukan pembaikan, pembaikan itu akan dibuat dengan secara yang baik. Dalam pada itu juga, adalah menjadi *concern* kepada Kementerian Pembangunan sendiri mengenai "*property market*", "*property market*" ini adalah satu industri yang belum terkawal benar-benar, jadi Insya Allah penumpuan terhadap perkara ini akan dibuat dari semasa ke semasa.

Pengerusi: Ahli Yang Berhormat memadailah penerangan itu.

Yang Berhormat Dato Paduka Awang Haji Puasa bin Orang Kaya Seri Pahlawan Tudin: Terim kasih Yang Amat Mulia Pengiran Pengerusi. Peramba ingin menimbulkan tanah yang tempoh 50 tahun. Pada masa ini geran-geran tanah yang tempohnya sudah mansuh atau hampir mansuh apabila dipohonkan untuk disambung atau dibaharui pemiliknya dikenakan bayaran *premium* yang sangat tinggi dan sulit bagi tuan-tuan punya tanah untuk membayarnya, jika tuan-tuan tanah ini tidak berkemampuan

membayarnya geran tanah mereka tidak akan diuruskan pembaharuannya dan mereka dinasihatkan memohon secara TOL sahaja jika mereka ingin terus menduduki rumah mereka itu dan tanah mereka itu.

Mereka ini memanglah tidak bernasib baik kerana tanah ini dulunya mereka beli dan ada tanah ini mereka dapati secara turun-temurun, kalau yang dibeli mereka membeli tanah ini dengan mengeluarkan wang yang banyak dan mereka memperolehi sebagai pusaka daripada indung bapa mereka yang kemudiannya akan diwariskan kepada anak cucu mereka, mereka tidak menyangka yang mereka ini dikenakan bayaran untuk membaharui geran tanah mereka ini.

Saya mencadangkan dan mensyurkan di sini supaya geran lama yang dikeluarkan dalam tempoh 50 tahun ini akan dapat dibaharui sahaja keseluruhan geran tanah itu dengan tidak dikenakan *premium* tetapi bayaran-bayaran perubahan tukar syarat dan sebagainya bolehlah dikenakan, ini memandangkan kesusahan-kesusahan yang dihadapi oleh tuan-tuan tanah yang berkenaan.

Kalaulah ini disambung sekiranya tidak diberikan secara kekal disambung mengikut tempoh yang ada dengan ditulis dalam geran tersebut maka pihak yang berkenaan bolehlah mengadakan syarat-syarat tambahan seperti geran tanah ini tidak boleh dijual atau tanah ini hanya boleh ditukar milik kepada waris-waris tuan tanah itu. Sekian Yang Amat Mulia Pengiran Pengerusi.

Pengerusi: Ahli Yang Berhormat Menteri Pembangunan silakan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar:

Menjunjung kasih sekali lagi. Peramba mengucapkan terima kasih kepada Ahli Yang Berhormat Dato Paduka Awang Haji Puasa, sebenarnya dalam ucapan penangguhan yang lepas seorang Ahli Yang Berhormat lain menimbulkan perkara ini juga. Jadi perlulah peramba memberikan pandangan sedikit bahawa *premium* itu pada masa ini sedang diteliti tapi yang perlu ditekankan di sini apa

yang dipanggilkan *premium* yang sangat tinggi itu kerana dalam penelitian "*premium*" ini adalah "*concessionary*" premium ertinya sudah diberikan "*concession*", misalan kalau orang itu akan membayar tanah pertanian hanya 10% daripada nilai tanah itu bukannya nilai kekal. Jadi kalau 10% pun tinggi terpaksa kita nilai semula cara-cara kita mengadakan "*concessionary*" premium ini. Mendengar cadangan daripada Ahli Yang Berhormat tadi alhamdulillah dapatlah cadangan-cadangan itu dijadikan *input* dalam menimbang kertas-kertas itu untuk dijadikan dasar Kerajaan.

Pengerusi: Terima kasih.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Beberapa usahalah termasuklah yang disebutkan oleh Yang Berhormat itu dijalankan menangani masalah ini atau sebagai langkah yang penghabisan untuk memindah dari Sungai Akar atau macam caranya sama ada kitani menggunakan kaedah-kaedah pembuangan sampah baru atau di mana sedang dalam

penelitianlah. Mengenai staf atau kalau sekiranya ada orang memberitahu siapa-siapa bahawa stafnya mencukupi, baik tah, Alhamdulillah tah jua tu, saya, peramba inda pernah mendengar staf ani mencukupi.

Jadi apa yang dapat dibuat dengan staf yang ada ani ialah memanfaatkan dengan memberi prioriti ada kerja-kerja yang dibuat, mula-mula kerja yang akan dibuat dalam alam sekitar masa ani ialah "*awareness*" dulu yang mustahak sekali yang memberi kesedaran kepada generasi kitani dan generasi yang akan datang tentang peri mustahaknya alam sekitar ani untuk kehidupan kitani yang berkualiti di masa akan datang.

Pengerusi: Cukup jelas Ahli Yang Berhormat.

Yang Berhormat Awang Haji Bakar bin Haji Mansor: Banyak-banyak menjunjung kasih Yang Amat Mulia Pengiran Pengerusi Jabatan Alam Sekitar dan Taman Rekreasi di Negara ini memang sudah diusahakan. Di sini peramba

saya memohonkan agar pihak yang berkenaan akan berusaha lagi untuk menambahkan dan meneroka tempat-tempat yang bersesuaian untuk dijadikan Teman Rekreasi di Negara ini termasuklah peramba saya cadangkan supaya Bukit Saeh yang kedudukannya di kawasan Bandar Seri Begawan, supaya pihak yang berkenaan akan membuka dan membina sebagai satu Taman Rekreasi kerana ianya terletak di kawasan Bandar Seri Begawan dan mengikut pengalaman yang sudah-sudah Bukit Saeh ini memang banyak dikunjungi oleh orang-orang luar dan juga penduduk tempatan di Negara ini. Menjunjung kasih, Assalamualaikum.

Pengerusi: Waallaikumussalam, Ahli Yang Berhormat silakan.

Yang Berhormat Pehin Orang Kaya Hamzah Pahlawan Dato Paduka Awang Haji Abdullah bin Begawan Mudim Dato Paduka Haji Bakar: Junjung kasih peramba mengambil maklum atas cadangan itu, dan terima kasih atas cadangan itu.

Pengerusi: Ahli-ahli Yang Berhormat.

Yang Berhormat Awang Haji Mohd. Shafiee bin Ahmad: Terima kasih Yang Amat Mulia Pengiran Pengerusi, itu saja, Peramba maklum bahawa Jabatan Alam Sekitar dan Taman Rekreasi ini memang baru khususnya di Daerah Belait, walaubagaimanapun peramba mohonlah ditambah bilangan tenaga pekerjaanya bagi menangani tanggungjawab yang bertambah dari masa ke semasa. Yang pertama, kedua pegawai-pegawai dan kakitangan yang di Kuala Belait itu diberi mandat untuk memberi kebenaran di atas setiap penggunaan kemudahan-kemudahan riadah yang di bawah kawalan Jabatan tersebut tanpa merujuk Bandar Seri Begawan. Terima kasih Pengiran Pengerusi.

Pengerusi: Sila ambil maklum, Ahli-Ahli Yang Berhormat sekiranya tidak ada perbincangan mengenai dengan Tajuk ini. Maka Tajuk ini saya sifatkan sebagai diluluskan oleh Jawatankuasa ini.

Jurutulis: Tajuk SK08A Jabatan Alam Sekitar Taman dan Rekreasi dijadikan sebahagian daripada Jadual.

Pengerusi: Ahli-Ahli Yang Berhormat, sekarang kita akan balik semula bersidang penuh daripada Jawatankuasa ini, sekarang kita akan mulakan persidangan penuh.

sehingga jam 2.30 petang ini. Terima kasih.

(Majlis ditangguhkan)

(Majlis bersidang semula)

Yang Dipertua Dewan: Alhamdulillah, di dalam persidangan Jawatankuasa tadi semua Ahli mengemukakan dan juga menjawab sebegitu bekerjasama dalam suasana yang baik dan indah maka kita harapkan pada masa yang akan datang juga sedemikian. Oleh kerana waktu sekarang 11.00 lalu, jadi saya fikir Majlis ditangguhkan selama 20 minit.

(Majlis berehat sebentar)

Yang Dipertua Dewan: Ahli-Ahli Yang Berhormat, apabila di lihat jam sekarang sudah betul-betul pukul 12.00 tengah hari, adalah difikirkan pada jam 12.00 tengah hari ini untuk menyampaikan waktu kita berehat makan tidak memadai, maka bagi menyampaikan salah seorang hajat Ahli Yang Berhormat untuk menjemput kita ke majlis, saya tangguhkan